

Nunatsinni efterskolertut angajoqqaavisa pisortanut akiliuteqartitaanngitsumik kiisalu ilinniarnermi tapiissutinik pisalernissaannut ingerlanneqartalersinnaanerannut pillugu apeqquteqaat aallaavigalugu Inatsisartuni oqallisissiamik siunnersuut.

(Inatsisartunut ilaasortat Ruth Heilmann aamma Anders Olsen, Siumut)

Akissuteqaat

(Ilinniartitaanermut, Iisimatusarnermut Avannaamioqatigiillu suleqatigiinnerannut Naalakkersuisoq)

Siullermeerneqarnera

Naalakkersuisut Inatsisartunut ilaasortat Ruth Heilmann aamma Anders Olsen qutsavigaat apeqquteqaat tunngavigalugu oqallisissiarimmassuk Nunatsinni efterskolertut angajoqqaavisa akiliuteqartarunnaarnissaat atuartullu tapisiaqartalernissaat.

Nunatsinni efterkoleqalernera iluatsilluarsimavoq, inuusuttullu amerlaqisut efterskolemiinnerminni pissarsiaqarluareersimapput. Taamaattumik Naalakkersuisut ingerlatsineq malinnaaqqissaarfigaat inuusuttut sapinngisamik amerlanerpaat ilinniagaqaqqinnissaminnut pireernissaannik suliniutinut ilaatillugu.

Nunatsinni Danmarkimilumi efterskolertut angajoqqaavisa akiliuteqartarnerat Naalakkersuisut 2013-imi misissuiffigiinarpaat angajoqqaat akiliuteqartarnerisa ilusissaanik 2014-imi aningaasanut inatsimmut siunnersuuteqarnissaq siunertaralugu

Efterskolit imminnut pigisuupput, inuusuttut namminneq piumassusertik malillugu atuarfigisinnaasaat, pisortat toqqaannartumik akuliutinngikkaluarlugit. Apeqquteqaat tunngavigalugu oqallisissiami tunngavilersuutaavoq efterskolimiinneq ilaatigut Piareersarfimmiinnermut assersuunneqarsinnaasoq, taakkunanilu atuartut pikkorissarnerminni ilinniakkatigullu angusaqarneruniarnerminni tapiissutisisarput. Kisianni Piareersarfinnut innersuussisarneq pisarpoq pisortat neqeroorutaasa meeqqat atuarfiata tassanilu soraarummeertarnerit nangissutaattut, atuartut inaarutaasumik soraarummeernerminni angusaminnik pitsanngorsaasinnaaqqullugit ilinniagaqaqqissinnaanerat siunertaralugu. Pisortat tassani toqqaannartumik akuliusimapput, taamaattumillu taakkunani atuartut atuarnerminnut tapiissutinik pissarsisarput.

Efterskolimi atuartut taakkunani ineqarlutillu nerisaqartarmata nalilerneqarsimavoq efterskolimi atuartut tapiiffigineqartarnissamik Piareersarfinni atuartutulli pisariaqartitsitiginngitsut.

Naalakkersuisut soqutigisarilluinnarpaat inuusuttut akornanni ilinniagaqarusussuseqalersitsiniarnerup nalilersortuarneqarnissaa oqallisiginissaalu, taamaattumillu ullumi oqallinnissaq soqutigalugu malinnaavigissallugu. Isummat saqqummiunneqarumaartussat assigiinngitsut ilanngunneqassapput Naalakkersuisut efterskolit pillugit 2013-imi nalilersuinissaannut.

Taama oqaaseqarlunga oqallilluarnissassinnik kissaappassi.